


ALAHADY FAHA 19 MANDAVANTAONA A 2023-



MAMPATOKY NY MANATONA AN'I JESOA MPAMONJY

Ry Kristianina havana, tamin'ny Alahady lasa teo dia nankalaza an'i Jesoa niova tarehy teo antendrombohitra isika izay andro namaranana koa ny JMJ ka nanirahan'I Papa François an'ireo tanora maro be tany Lisbone mba ho tahaka an'I Masina Maria ho "Tabernakla velona", "Mitsangana miainga malaky" hitondra an'I Jesoa, ho Kristy MPIARA-BELONA, ho "génération" mpanorina fa "tsy mpandrava". Araka izany dia hitantsika fa mifanaraka tanteraka amin'ny Sinaody fa indrindra izao dingana faharoa izao dia Fianakaviana Eglisy kely miaro sy mikolokolo ny tontolo iainana izao. Mila génération mpanorina isika mba handova ny tany dia ity tranobe iombonana

Vakiteny I : 1 Mpanj. 19, 9a. 11-13a.
Tononkira : Salamo 8
Vakiteny II : Rôm. 9, 1-5
Evanjely : Mt. 14, 22-33

ity, ho voakolokolo satria napetrak'Andriamanitra ho karakaraantsika, fanamby ho antsika tokoa izany ka hivelomantsika ny maha Kristy MPIARA-BELONA amin'ny olona antsika, ho mpanorina isika fa tsy hoe sanatria ho mpandrava na mpanapotika, ho taranaka mpandova ny tany, ho taranaka mpanorina, manatsara sy

mandavorary ny fiainana ary i Kristy no modely ho antsika amin'izany.

Tian'ny Eglisy àry ho tsapantsika amin'izao Alahady faha-19 mandavantaona izao ny hampianatra antsika mba hatoky manatona an'i Jesoa na dia misamboaravoara aza ny fiainana, na dia misy aza mitady handrava, na dia misy aza mitady hanapotika. Miatrika krizy maro lafy tokoa isika izao.

Hitantsika ao amin'ny Evanjely i Piera nahita an'i Jesoa nandeha teo ambony rano ka nanatona an'i Jesoa, natoky tena loatra izy ka nilentika. Toetrantsika koa io, matetika isika rehefa mahomby kely dia efa mipoerapoera, mirehareha ka lavo tahaka an'I Piera miantso vonjy.

Eo anivontsika i Jesoa, MPIARA-BELONA amintsika, ka Izy no nanarina an'i Piera ary nilaza taminy hoe aza matahotra, manatona eto akaikiko ianao, na eo aza ny onjan-dranomasina dia zary tony. Afaka niroso i Piera nanatona an'i Jesoa ka tamin'izay indrindra no nanaovany ny fiekm-pinoana "kely finoana aho ka ampio ny finoako, tena tsy mendrika hanatona Anao akory aho, ary ianao no

zanak'Andriamanitra". Hitantsika fa mampiova zavatra maro tokoa ny finoana. Fampianarana lehibe ho antsika izany fa indrindra ianareo tanora taranaka mpanorina, aoka ho fantantsika fa tsy maintsy miaraka amin'i Jesoa isika vao afaka manorina. Amin'ny alalany sy miaraka Aminy ary ao Aminy no hahafahantsika manorina satria i Jesoa tsy lavitra antsika, tsy sanatria matoatoa Izy ary izany no nolazainy tamin'ny mpianany.

Miantso antsika i Kristy ankehitriny ry tanora zandry malala, tahaka nataony tamin'i Piera hoe "Avia".

"Ady sady Dia" ny fiainantsika, ady amin'ny ratsy nefà handresy isika na dia mitady handrendrika antsika aza ny ratsy satria nandresy i Jesoa, ho tody soa amantsara isika tahaka an'i Piera. Tsy ny tanora ihany no antsoin'i Jesoa fa indrindra amin'izao krizy izao fa isika jiaby ary izany no antony anaovantsika izao Sinaody izao. Miantso i Jesoa ary isika miara-mamaly ary miara-dalana miara-mandroso amin'ny lalindalina kokoa.

Aoka ny fampianarana amin'izao Alahady faha-19 izao hanampy antsika hifototra tsara amin'i Jesoa ny fiainantsika hivahatra amin'I Jesoa. Hanam-pinoana isika ka hilaza tahaka an'i Piera hoe tsy mendrika aho ka hampian'i Jesoa isika ao anatin'ireny fiainana sarotra ireny, ny tadiavin'i Jesoa dia isika hifikitra Aminy.

Ry EOV hava-malala, ry Eglisy Velomin'ny Batemy miombona miara-dalana, fantaro fa arakaraky ny fifikirantsika amin'i Jesoa no hahafahantsika mitondra ny famonjena eo amin'ny mpiara-belona, hahazoantsika aina sy hery vaovao, aza mieritreritra isika fa noho ny saim-pantantsika na noho ny volantsika na noho ny talentantsika no hahafahantsika mamonjy an'ity firenentsika ity, mila an'i Jesoa isika ary izay no maha taranaka mpanorina antsika. Matoa maro ny zava mirodana ary very repère isika dia tahaka an'I Piera teny ambony rano. Mipoerapoera mahavita tena kanefa mbola mila an'I Jesoa.

Ampianarin'i Md Paoly antsika ao amin'ny vakiteny faharoa : "raha ny sitrako dia aoka izaho no voaozona mba hahavoavonjy ny taranako". Izany hoe mila fanoloran-tena, mila fahafoizana izany fiombonana amin'i Jesoa izany, tsy hoe mandeha ho azy fa tsy maintsy mahafoy tena isika.

"milaza ny marina ao amin'i Kristy aho, ka tsy mandainga, ary ny Fanahy Masina sy ny hitsim-poko no vavolobeloko, fa malahelo mafy aho, ory lalandava ny foko, satria saiky niriko aza ny ho voaozona ho lavitra an'i Kristy ny tenako, hamonjeko ny iray finoana amiko, izay havako araka ny nofo, dia ireo Israelita, izay manana ny fananganan-janaka, sy ny voninahitra, sy ny fanekena, sy ny lalàna sy ny fombam-pivavahana, ary ny fampanantenana."

Tsy maintsy mahafoy tena isika mba ho Kristy mpiara-belona amin'olona izany hoe hahafahantsika manambara an'i Kristy amin'ny fiainantsika ary dia manana modely isika hoy Md Paoly. Vavolobelona tokoa ny fiainan'i Victoire Rasoamanarivo sy i Lucien Botovasoa izay fantantsika fa nahafoy ny ainy noho ny fitiavany mpiray tanindrazana taminy.

Tsy ampy ny fitiavan-tanindrazana na dia efa dingana lehibe azy fa ny tena ilaina dia ny fahafoizana. Aoka ho hery antsika amin'izany ny tantaran'i Elia ao amin'ny vakiteny voalohany izay nihevitra hahita an'Andriamanitra ao anaty rivodoza, na afo. Tsy misy herisетra ao amin'Andriamanitra fa amin'ny alalan'ny fahanginana sy fiombonana Aminy no isehoany, tsy anaty horohoron-tany na rivotra na afobe ny fisehony fa anatin'ny tsioka mangina izany hoe aoka hatoky an'Andriamanitra isika, raha miaraka Aminy isika dia afaka hanorina fiainana tena izy, izany no fampianarana naverimberina

tamintsika nandritra ny JMJ teto amin'ny diosezy iny : Sambatra ny malemy fanahy", tsy amin'ny alalan'ny herisetra na hetraketraka no hahazoantsika hasambarana. Famonoana, fanapotehana no vokatry ny herisetra ka raha tiantsika ny hampandroso ny tanintsika ity aoka ho tahaka ny rentsika amin'ny vakiteny voalohany io , aoka ao anatin'ny fahalemem-panahy, hitsim-po, fahamarinana no iainantsika.

"Sambatra ny malemy fanahy fa izy no handova ny tany" izay anaty tranobe iombonana ity ka na dia eo aza ny hetraketraky ny fiaianana dia i Kristy milaza amintsika tahaka ny nolazainy an'i Piera hoe "Avia manatona". Koa na dia eo ny savoaramboaram-piaianana dia handeha ambony rano isika. Tsy araky ny saim-pantantsika anefa fa aoka ao Aminy sy amin'ny alalany no entintsika hamakivaky ny fiaianana sarotra. Ady sady dia ny fiaianana ka matokia an'i Jesoa isika tahaka ny nanampiany an'i Piera.

Ry Jesoa zokinay ô, mazava fa tianao tokoa izahay, fantatrao ny rivotra mahery, mangozohozo ny fiaiananay, fantatrao ny zavatra manahirana manembantsembana ao anatinay, fantatrao ny tahotray eo amin'ny fiaianana, fantatrao ny tebiteby, koa ampio àry izahay hahay hidodododo hankeo Aminao ka amin'izay ho tafita soa aman-tsara eo anivon'ny fiaiananay izahay ka handova ny tany. Hokarakarainay ity tranobe iombonana ity ka amin'izay dia hiadam-pinaritra ao Aminao izahay. Masina Maria Reny, Reny miahys anay zanaka tokoa ianao. Misamboaravoara ny fiaiananay amin'izao ka ampio izahay hanatona an'I Jesoa ka Izy anie hampitony ny rivotra mila handrendrika anay. Md Josefa tohano am-bavaka izahay amin'izao Sinaody izao mba ho tafita soa aman-tsara ny dinikay rehetra.

Amen

Mompera Arseveka Mgr Benjamin Ramaroson